



In nov policist sursilvan, Christian Casanova (dretg) da Ruschein, cun ses bab Toni Casanova.



L'unica nova policista Simona Cortesi cun ils geniturs Tarcisio e Romana Cortesi.



La ceremonia principala da la brevetaziun è segir l'empermischun da mintga policist.



Cusseglier guvernativ Christian Rathgeb, presidenta dal cussegl grond Elita Florin-Caluori e Remo Fehr, uffizi da la natira e da l'ambient (da san.).



Star si dretg sco in pal per ils novs policists.



La nova policista ed ils novs policists cun lur superiurs: Christian Rathgeb (davant san.) e Walter Schlegel (2. davos da dretg).

«L'empermischun è er in mument da confidenza»

Cuira: Festa da brevetaziun dals novs policists

DA GION NUTEGN STGIER / ANR

■ **Da nov ha la polizia chantunala ina policista e 9 policists. En in rom festiv ha gi lieu a Curia la brevetaziun dals novs commembers dal corp da polizia. A quel appartegnan radund 400 policists e policistas. Cusseglier guvernativ Christian Rathgeb ha gratulà a tuts novs policists per la finiziun da la scolaziun da basa.** En preschientscha da la presidenta dal cussegl grond, *Elita Florin-Caluori*, da cusseglier guvernativ *Christian Rathgeb*, dal nov cumandant da la polizia *Walter Schlegel*, da represchentsants dal militar e cunzunt er da bliers confamigliars en vegnids saramentads ils 9 policists e la policista che han terminà cun success la scolaziun da basa da polizia ad Amriswil. Per *Walter Schlegel*, il nov cumandant da la polizia, è quella festa da brevetaziun stada l'emprima en sia nova funcziun. Quai è dentant era stà il cas tar cusseglier guvernativ *Christian Rathgeb*, il schef dal departament da giustia, segirezza e sanadad. En ses pled da bainvegni ha *Walter Schlegel* ditg a la nova policista ed als novs policists che a partir dad ussa sa midia blier en lur vita professionala. «Quai va da las obligaziuns e dals dretgs en il servetsch da Polizia chantunala dal Grischun fin a l'emprim lieu da staziuna-

ment», ha ditg *Walter Schlegel*. El ha er anc ditg il suandant: «En il center da vossa lavur vegnan a star ils umans da noss chantun, vus vegnis ad arrivar en situaziuns, en las qualas els han simpatias per vus, ma vus vegnis er a sentir critica e nunchapientscha u vegnids refusads avertamain», ha ditg il cumandant da la polizia chantunala.

«Vus avais er ina obligaziun da discreziun»

Er cusseglier guvernativ *Christian Rathgeb* ha drizzà intgins plects a la nova policista ed als novs policists. «Cun avair fatg l'empermischun avais vus uss er ina obligaziun envers la regenza, envers voss superiurs ed er envers la populaziun da noss chantun», ha accentuà il pli aut «policist» grischun. El ha er ditg a la dunna ed als umens ch'appartegnan ussa da nov a la polizia chantunala ch'els hajan ina obligaziun da discreziun, almain quai che pertutga lur lavur. L'empermischun saja però er in mument da confidenza e gist quella saja da gronda impurtanza en la vita professionala dad in policist, ha ditg *Christian Rathgeb*. Ademplier las pretensiuns, sa tegnair a la vardad, acceptar lur collegas da lavur e l'uman, quai sajan er obligaziuns dad in policist, ha menziunà *Christian Rathgeb*. «En l'a-

vegnir essas vus savens en il center e quai en bunas, dentant er en situaziuns pli malempernaivlas», ha ditg il schef dal departament da giustia, segirezza e sanadad als protagonistas tar la festa da brevetaziun en la sala dal cussegl grond a Cuira. La festa è vegnida enramada da la Musica da polizia dal Grischun e suenter han ils confamigliars pudì gratular als «anteriurs» aspirants da la polizia.

La nova policista ed ils novs novs policists da la Polizia chantunala dal Grischun cun lur emprims lieus da staziunament:

- Ammann Hansruedi*, post da polizia Sta. Maria
- Beeler Damian*, post da polizia Silvaplana
- Casanova Christian*, post da polizia Roveredo
- Cortesi Simona*, post da polizia San Murezzan
- Hess Balthasar*, basa da la polizia da traffic Tavau
- Lenz Aden*, post da polizia San Murezzan
- Morell Arno*, post da polizia San Murezzan
- Müller Andri*, post da polizia Martina
- Stocker Philipp*, basa da la polizia da traffic Tusaun
- Tuena Arno*, basa da la polizia da traffic Tusaun



Ils novs policists taidlan ils plects da cusseglier guvernativ Christian Rathgeb.